

東坡先生全集卷之六十一

尺牘

與辯才禪師六首

以下俱翰林

久不奉書愧仰增深比日切惟法履佳休某忝冒
過分碌碌無補日望東南一郡庶幾臨老復聞法
音尚冀以時爲衆自愛

二

某向與兒子竺僧名迨於觀音前剃落權寄緇褐
去歲明堂恩已奏授承務郎謹與買得度牒一道
以贖此子今附趙君齎納取老師意剃度一人仍

東坡全集卷之六十一
告於觀音前畧祝願過悚息悚息

三

某有少微願須至仰煩切料慈照必不見罪某與舍弟某捨絹一百疋奉爲先君霸州文安縣主簿累贈中大夫先妣武昌郡太君程氏造地藏菩薩一尊并座及侍者二人菩薩身之大小如中形人所費盡以此絹而已若錢少卽省鏤刻之工可也乞爲指揮選匠便造造成示及專求便船迎取欲京師寺中供養也煩勞神用愧悚不已

四 杭州還朝

某啓法孫至領手教累幅伏承道體安康以慰下
情前此所惠書信皆領無狀每荷存記感忤亡已
真贊更煩刻石甚愧不稱維摩贊近杜介刻脫却
數字好笑好笑唯金山石本是也信口妄語便
蒙印可罪過罪過聞老師益健更乞倍加愛重且
爲東南道俗歸依也某衰病不復有功名意此去
且勉歲月纔得箇退縮方便卽歸常州住也更告
法師爲禱諸聖令早得歸爲幸此是真切之意勿
令人知將爲虛僞迫行冗中不宜

五

以下俱
潁州

東坡全集卷之六十一
某啓別來思仰日深比來道體何如某幸於閭中
抽頭得此閒郡雖未能超然遠引亦退老之漸也
思企吳越諸道友江山之勝不去心或更送老請
會稽一次老師必能爲此一郡道侶少留山中勿
便歸安養不肖更得少接清游何幸如之惟千萬
保重不宣

六

近日百事懶廢寢食之外頽然而已寫此數紙書
一似小兒逃學來人催迫日推一日相知惠書皆
不能荅如相怪且爲道此意老病不足責也

與叅寥子二十首

密州

某啓別來思企不可言每至逍遙堂未嘗不悵然
也爲書勤勤不忘如此仍審比來法體康佳感服
兼至三詩皆清妙讀之不釋手且和一篇爲荅所
要眞贊尚未作來人又不敢久留甚愧甚愧知且
伴太虛爲湯泉之游甚善甚善某開春乞江浙一
郡候見去處當以書奉約也要墨納兩笏皆佳品
也餘惟爲法自重適有數客遠來相看陪接少暇
奉啓不盡意

二

以下俱
黃州

某啓去歲倉卒離湖亦以不一別太虛叅寥爲恨
留語與僧官不識能道否到黃已半年朋游稀少
思念二公不去心懶且無便故不奉書遠承差人
致問殷勤累幅所以開諭獎勵者至矣僕罪大責
輕謫居以來杜門念咎而已平生親識亦斷往還
理故宜爾而釋老數公乃復千里致問情義之厚
有加於平日以此知道德高風果在世外也見寄
數詩及近編詩集詳味灑然如接清顏聽軟語也
此已焚筆硯斷作詩故無緣屬和然時復一開以
慰孤疾幸甚幸甚筆力愈老健清熟過於向之所

見此於至道殊不相妨何爲廢之耶當更磨揉以
追配彭澤未間自愛不宣

三

知非久往四明璉老且爲致區區欲寫一書爲來
人告還寫書多故懶倦容後便也僕有捨羅漢一
堂在育王山禪月筆也可一觀

四

聰師相別五六年不謂便爾長進詩語筆蹤皆可
畏遂爲名僧法足非特巧慧而已又聞今年剃度
可喜太虛只在高郵近舍弟過彼相見亦有書來

東坡全集卷之六十一
題名絕竒辨才要書其後復寄一紙去然不須入
石也黃州絕無所產又窘乏殊甚好便不能寄信
物去只有布一疋作臥單懷悚懷悚

五

覽太虛題名皆予昔日游行處閉目想之了然可
數始予與辯才別五年乃自徐州遷于湖至高郵
見太虛參寥遂載與俱辯才聞予至欲扁舟相過
以結夏未果太虛參寥又相與適越云秋盡當還
而予倉卒去郡遂不復見明年予謫居黃州辯才
參寥遣人致問且以題名相示時去中秋不十日

秋潦方漲水面十里月出房心間風露浩然所居
去江無十步獨與兒子邁棹小舟至赤壁西望武
昌山谷喬木蒼然雲濤際天因錄以寄參寥使以
示辯才有便至高郵亦可錄以寄太虛也

六

以下俱
穎州

兩得手書具審法體佳勝辯才遂化去雖來去本
無而情鍾我輩不免悽愴也今有莫文一首并銀
二兩託爲致茶果一奠之賴師得書且喜進道紙
尾待得閑寫去餘惟萬萬自重

七

某在潁一味適其自得也承惠家園新茗珍感之
至紫衣脚色已付錢今冬必得已託王晉卿收附
遞至智果也四公子亭他輩非吝但近日人言尤
可畏薄惡之甚故未可也必深悉此潁上人道業
必進託爲傳語聰公病懶不寫書不訝不訝邁已
赴河間來書續附去次少游近致一場鬧皆羣小
忌其超拔也今且無事閑知之

八 赴定州

某啓吳子野至出潁沙彌行草書蕭然有塵外意
決知不日潁脫而出不可復沒矣可喜可喜近遞

中附呂丞相所奏妙總師號牒去必已受訖卽日
起居何如某來日出城赴定州南北當又睽隔然
請會稽之意終未已也更當俟年歲間耳未曾見
間千萬善愛

又啓吳子野至辱書今又遣人示問併增感佩畏
暑伏惟法履清勝驚聞上足素座主奄化爲之出
涕竊惟教育成就義均天屬割慈忍愛如何可言
奈何奈何追念此道人茹苦含辛崎嶇奉事豈有
他哉求道故也雖寡文而守節疾邪得師之一二
欲更求此豈易得耶又幹蠱之人目前紛紛便及

東坡全集卷之六十一
老師兩日念此爲廢飲食奈何奈何達觀之人固有以處此更望爲道寬中自愛不宣

九定州

某啓紛紛久不奉書竊惟起居住勝呂丞相爲公奏得妙總師號見託寄上此公着意人物至於山水世外之士亦欲成就使之顯聞近奏王子直處士之類公雖無用不可不領其意初不相識而能相薦此又古人之事也秦少游作史官亦稍見公議亦呂公薦也未由會合千萬自重

十

以下俱
南遷

彌陀像甚圓滿非妙總留意安能及此存沒感荷
也公欲留施水何不便留下今旣賫至此長大難
得人肯附去輒已帶行欲作一贊題記捨廬山一
大剎爾

十一

穎上人知學道長進甚善甚善鍾和尚奄忽哀苦
不易不別書奉慰惟節哀勉力寬老和尚心宜興
兒子處支米十石請用鍾和尚念佛追福也

十二

某垂老再被嚴譴皆愚自取無足言者事皆已往

東坡全集卷之六十一
譬之墜甌無可追計從來奉養陋薄廩入雖微亦
可供麤糲及子由分俸七千邁將家大半就食宜
興旣不失所外何復挂心實脩然此行也已達江
上耳目清快幸不深念知識中有憂我者以是語
之紗裹肚鞵各一致區區而已英州南北物皆有
某一飽之外亦無所須承問所幹感懼而已

十三

某啓辱書感慰之極目病已平復某雖衰老遠徙
亦且凡百如昨不煩深念但借譽過當非所安全
不肖者勿遣異人聞此語也呵呵

十四

參寥失鍾師如失左右手不至大段煩惱否且多方解之仍衆與善處院門事也後會何日千萬自愛寫書多不謹

十五

以下俱
惠州

海月真贊許他二十餘年矣因循不作因來諭輒爲之不及作慧淨書幸付與此本也表忠觀記及辯才塔銘後來不見入石必是僕與舍弟得罪人未敢便刻也此真贊更請參寥相度如未可且與藏公處也

東坡全集卷之六十一
十六

某啓專人來辱手書并示近詩如獲一笑之樂數
日慰喜忘味也某到貶所半年凡百粗遣更不能
細說大畧只似靈隱天竺和尚退院後却住一箇
小村院子折足鐺中菴糙米飯便喫過一生也得
其餘瘴癘病人北方何嘗不病是病皆死得人何
必瘴氣又苦無醫藥京師國醫手裏死漢尤多參
寥聞此一笑當不復憂我也故人相知者卽以此
語之餘人不足與道也未會合千萬爲道自愛

十七

潁沙彌書跡巉聳可愛他日真妙總門下龍象也
老夫不復止以詩句字畫期之矣師年紀不小尚
留情句畫間爲兒戲乎然此廻示詩超然真遊戲
三昧也居閒不免弄筆硯見索書字要楷法輒作
數篇終不甚楷也只讀了付潁師收勿示餘人也
雪浪齋詩尤奇偉感激感激轉海相訪一段奇事
但聞海舶遇風如在高山上墮深谷中非愚無知
與至人皆不可處胥靡遺生恐吾輩不可學若是
至人無一事冒此險做甚麼千萬勿萌此意潁師
喜於得預乘桴之游所謂無所取材者其言切不